

四庫全書

子部

欽定四庫全書

子部

太白陰經卷一至三

詳校官中書臣閔思毅

編修臣倉聖脈覆勘

總校官知縣臣繆琪

校對官編修臣錢樾

謄錄監生臣李干霄

欽定四庫全書

子部二

太白陰經

兵家類

提要

臣等謹案太白陰經八卷唐李筌撰筌里籍未詳惟集仙傳稱其仕至荆南節度副使仙州刺史著太白陰經又神仙感遇傳曰筌有將畧作太白陰符十卷入山訪道不知所終太白陰符當即此書傳寫訛一字也考唐書

藝文志宋史藝文志皆云太白陰經十卷而此本止八卷疑非完帙然核其篇目始於天地陰陽險阻終於雜占首尾完具又似無所闕佚殆後人傳寫有所合併故卷數不同與兵家者流大抵以權謀相尚儒家者流又往往持論迂濶諱言軍旅蓋兩失之筌此書先言主有道德後言國有富強內外兼修可謂持平之論其人終於一郡其術亦未有所試

不比孫吳穰苴李靖諸人以將畧表見於後  
世然杜佑通典兵類取通論二家一則李靖  
兵法一即此經其攻城具篇則取為攻城具  
守城具篇築城篇鑿濠篇弩臺篇烽燧臺篇  
馬鋪土河篇游奕地聽篇則取為守拒法水  
攻具篇則取為水戰具濟水具篇則取為軍  
行渡水火攻具篇火戰具篇則取為火兵井  
泉篇則取為識水泉宴娛音樂篇則取為聲

感人是佑之採用此書與李靖之書無異其  
必有以取之矣靖之兵法宋時已殘闕舛訛  
阮逸所傳又亂以偽本筌此經至今猶存惟  
篇首陰經總序及天地無陰陽篇有錄無書  
不知佚於何時今則無從校補矣乾隆四十  
五年十月恭校上

總纂官

臣紀昀

臣陸錫熊

臣孫士毅

總校官

臣

陸

費

墀

欽定四庫全書

太白陰經卷一

唐 李筌 撰

人謀上

陰經總序第一

原闕

天地無陰陽篇第二

原闕

人無勇怯篇第三

經曰勇怯有性強弱有地秦人勁晉人剛吳人怯蜀人

懦楚人輕齊人多詐越人澆薄海岱之人壯崆峒之人  
武燕趙之人銳涼隴之人勇韓魏之人厚地勢所生人  
氣所受勇怯然也且勇怯在謀強弱在勢謀能勢成則  
怯者勇謀者奪也夫制勇怯之道言秦人勁申屠之子  
敵於嶢關杜洪之將北於濊水則秦人何得而稱勁吳  
人怯吳王夫差兵無敵於天下敗齊於艾陵爭長於黃  
池則吳人何得而稱怯蜀人懦諸葛孔明撮巴蜀之衆  
窺兵中原身為殭屍而威加魏將則蜀人何得而稱懦



楚人輕項羽破秦虜王離殺蘓角威加海內諸侯俯伏  
莫敢仰視楚人何得而稱輕齊人多詐田橫感五百烈  
士東奔海島及死同日伏劍則齊人何得而稱詐越人  
澆薄越王勾踐以殘亡之國恤孤老之衆九歲滅吳以  
弱攻強以小取大則越人何得而稱澆薄燕趙之人銳  
蚩尤敗於涿鹿燕丹死於易水王濬縛於薊門公孫戮  
於上谷則燕趙之人何得而稱銳涼隴之人勇所謂勇  
怯在乎法成敗在乎智怯人使之以刑勇人使之以賞

刑能移人之性賞能勵人之心者在刑賞之間勇之與怯於人何有哉

主有道德篇第四

經曰古者三皇得道之統立於中央神馬化遊以撫四方天下無所歸其功道廢王者出而尚仁義仁義廢伯者出而尚智力智力廢戰國出而尚詭詐聖人之道不足以理則用法法不足以理則用術術不足以理則用權權不足以理則用勢勢用則大兼小強吞弱周建一

千八百諸侯其後併為六國六國連兵結難戰爭日起  
六國之君非疏道德而親權勢權勢用不得不親道德  
廢不得不疏其理然也惟聖人能返始復本以正理國  
以奇用兵以無事理天下正者名法也奇者權術也以  
名法理國則萬物不能亂以權術用兵則天下不能敵  
以無事理天下則萬物不能撓不撓則神清神清者智  
之原智平者心之府神清智平乃能形物之情人主知萬  
物之情裁而用之則君子小人不失其位夫德厚而位

卑者謂之過德薄而位尊者謂之失寧過於君子無失  
於小人過於君子則物得其理失於小人則物罹其殃  
故曰人不鑒於流水而鑒於止水以其清且平也人主  
之道清平則任人不失其材六官各守其職四封之內  
百姓之事任之於相四封之外敵國之事任之於將語  
曰將相明國無兵舜以干戚而服有苗魯以類宮而來  
淮夷以道勝者帝以德勝者王以謀勝者伯以力勝者  
強強兵滅伯兵絕帝王之兵前無敵人主之道信其然

矣

國有強富篇第五

經曰國之所以富強者審權以操柄審數以御人課農者術之事而富在律謀戰者權之事而強在兵故曰興兵而伐叛則武爵任武爵任則兵強按兵而勸農桑勸農桑則國富國不法地不足以成其富兵不法謀不足以成其強古者聖人法天而皇賢君法地而帝智主法人而伯乘天之時因地之財用人之力乃可以富強乘

天時者春植穀秋植麥夏長成冬備藏因地之財者國有沃野之饒而人不足於食器用不備也國有山海之利而人不足於財商旅不備也通四方之珍異以有易無謂之商旅飭力以長地之財用資軍實謂之農夫絲麻以成其衣服謂之女工雲夢之毛羽黔溪之丹砂荆揚之草角骨江衡之枏梓會稽之箭燕齊之魚鹽旃裘兗豫之象絺苧鄭之刀宋之斤魯之削吳越之劍燕之涿角荆之韞玞胡之筈吳越之金錫此地之財也燕之涿

郡趙之邯鄲魏之溫軹韓之滎陽齊之臨淄陳之宛丘  
鄭之陽翟周之上洛越之具區楚之雲夢齊之鉅鹿宋  
之孟諸此地之良也共居其地非有災害疾病而貧者  
非惰則奢世無奇業而獨富貴者非儉則力同列而相  
臣妾者富貴使然也同貫而相兼併者強弱使然也同  
地而或強或弱者理亂使然也苟有市井交易所通貨  
財可積也夫有容身之地智者不言貧地誠任不患無  
財人誠用不畏強禦故神農教耕而王天下湯武戰伐

而服諸侯國愚則智可以強國智則力可以強人用智者可以強於內而富於外富於內而強於外是以漢武帝而平百粵以為園圃却羗胡以為苑囿珍怪異物充於後宮騶駼駃騠實於外廐馬廐乘堅良人間厭橘柚此謂智強於內而富於外秦孝公行墾草之令使商不得糴廢逆旅一山澤貴酒肉之價重關市之賦使農逸而商勞行之數年而倉廩實人知禮義至於始皇為之資東向而併吞諸侯此謂力富於內而兵強於外也故



知王伯之業非智不戰非農不贍過此以往而致富强者未之有也

賢有遇時篇第六

經曰賢人之生於世無藉地無貴宗無奇狀無智勇或賢或愚乍酖乍醒不可以事跡求不可以人物得其得之者在明君之心道合而志同信符而言順如覆水於地先流其濕如燎火於原先就其燥故伊尹有莘之耕夫夏癸之酒保湯得之於鼎鼐之間升陟而放桀太公

朝歌之鼓刀棘津之賣漿周得之於垂綸之下殺紂而立武伍員披髮徒跣挾弓矢乞食於吳闔閭向風而高其義下階迎之三日與語任之不疑范蠡生於五戶之墟為童時內視若盲反聽若聾時人得之至狂大夫種來觀而知其賢叩門而請謁相與歸於地戶管夷吾束縛於魯齊桓公任之以相百里奚自鬻於秦秦穆任之以政韓信南鄭之亡卒淮陰之怯夫漢高歸之以謀故曰人君之心如明鑑如澄泉圓明於中形之於外則使

賢任能不失其時有非心之見非智之知因人之視借人之聽其有炫眊叟以黼黻玄黃詔聳者以韶濩宮徵無貫於心欲求得人而幸其霸未之有也故五帝得其道而興三王失其道而廢興之道在人主之心得賢之用將有智勇篇第七

經曰太古之初有伯王氏至於容城氏不令而人自化不罰而人自齊不賞而人自勸不知怒不知喜俞然若赤子庖犧氏神農氏教而不誅軒轅氏陶唐氏有虞氏

誅而不怨蓋三皇之政以道五帝之政以德夏商湯武  
王廢道德任智謀秦商鞅李斯之智而并諸侯漢張良  
陳平之智而滅項籍光武任寇恂馮異之智而降樊崇  
曹公任許攸曹仁之智而破袁紹孫權任周瑜魯肅之  
智而破魏武劉備任諸葛亮之智而王西蜀晉任杜預  
王濬之智而平吳苻堅任王猛之智而定八州之衆石勒任  
張賓之智而生擒王浚拓跋任崔浩之智而保河朔之  
師宇文任李穆之智而挫高歡之銳梁王任僧辯之智

而面縛陳主太宗任李靖之智而破頡利可汗有國家者未有不任智謀而成王業者也故曰將軍之事以靜正理以神察微以智役物見福於重關之內慮患於杳冥之外者將之智謀也

實有陰經篇第八

經曰古之善用兵者必重天下之權而研諸侯之慮重權不審不知輕重強弱之稱揣情不審不知隱匿變化之動靜重莫難於周知揣莫難於悉舉事莫難於必成

此三者聖人能任之故兵有百戰百勝之術非善之善者也。不如不戰而屈人之兵，善之善者也。夫太上用計，謀其次用人事，其下用戰伐，用計謀者，營惑敵國之主，陰遺詔臣以事佐之，惑以巫覡，使其尊鬼事神，重其彩色，文繡使賤其菽粟，令空其倉廩，遺之美好，使榮其使，榮其志，遺之巧匠，使起宮室高臺，以竭其財，役其力，易其性，使奢暴驕恣，賢人結舌，莫肯匡助，濫賞淫刑，任其喜怒，政令不行，信卜祠鬼，奸邪進，諂諂請謁，公行而無聖。

人之政愛而與官無功而爵未勞而賞喜則赦罪怒則肆殺法居而自順令出而不行信著龜卜筮鬼神禱祠讒詔諛佞奇技貨財行於門戶其所謂是者皆非非者皆是離君臣之際塞忠讜之路然後淫之以色攻之以利娛之以樂養之以味以信為欺以欺為信以忠為叛以叛為忠諫者死諛佞者賞令君子在野小人在位急令暴刑人不堪命所謂未戰以陰謀傾之其國素已破矣以兵從之其君可虜其國可隳其城可拔其衆可潰

故周用之而殷紂殺越用此而吳國墟楚用此而陳蔡  
舉三家用此而魯滅韓魏用此而東周分儒生之言皆  
曰兵强大者必勝小弱者必亡是則十國之君無霸王  
之業萬乘之主無破亡之兆昔夏廣而湯狹殷大而周  
小越弱而吳強所謂不戰而勝者順傾之術襲行之道  
文武之教聖人昭然獨見忻然獨樂其茲乎

數有探心篇第九

經曰古者隣國烽烟相望雞犬相聞而足跡不絕於諸



侯之境車軌不結於千里之外以道存生以德安形人  
樂其居後世澆風起而淳朴散權智用而譎詐生隣國  
往來用間諜縱橫之事用隱括之人矣徐偃守仁義社  
稷丘墟魯尊儒墨宗廟泯滅非達與智慧不能禦伐不  
勞心苦思不能原事不悉見情偽不能成名材智不明  
不能用兵忠直不任不能知人是以鬼谷先生述捭闔揣  
摩飛箝抵巇之篇以教蘓秦張儀遊說於諸侯之國而探  
諸侯之心於是術行焉夫用探心之數者先以道德仁

義禮樂忠信詩書經傳子史計謀成敗渾而雜說包而羅之澄其心靜其志伺人之情有所愛惡去就從欲而攻之陰慮而陽發必虛往而實來此虛言而往彼實心而來因其心察其容聽其聲考其辭言不合者反而求之其應必出既得其心反射其意符應不失契合無二膠而漆之無使返復如養由之操弓逢蒙之挾矢百發無不中正者設置罟以網魚兔張其腰脇其虛必衝網而掛目亦奚有子遺哉夫探智人之心必以信勿以財

探勇士之心必以義勿以懼探智人之心必以忠勿以欺探愚人之心必以蔽勿以明探小人之心必以懼勿以常探好財之心必以賄勿以廉夫與智者言依於博智有涯而博無涯則智不可以測博與博者言依於辯博古而辯應今則古不可以應今與貴者言依於勢貴位高而勢制高則位不可以禁勢與富者言依於物富積財而物可寶則財不足以易寶與貧者言依於利貧匱乏而利豐贍則乏不可以調豐與賤者言依於謙賤

人下而謙降下則賤不可以調謙與勇者言依於敢勇  
不懼而取剛毅則勇不可以懾剛與愚者言依於銳愚  
質朴而銳聰明則朴不可以察聰此八句皆本同其道  
而末異其表同其道人所欲聽異其聽而不曉如此則  
不測淺不測深吾得出無間入無災獨往而獨來或縱而  
或橫如偃枯草使東而東使西而西如引涇水決之則  
流壅之則止用謀何患乎不從哉夫道貴制人不貴制  
於人制人者握權也制於人者遵命也制人之實避

人之長攻人之短見已之所長蔽已之所短故獸之動必先爪牙禽之動必先嘴距蟄蟲之動必先毒介蟲之毒必以甲夫禽獸蟲豸尚用所長以制物況其智者乎夫人之好言道德者必以仁義折之好言儒墨者必以縱橫禦之好談法律者必以權術挫之必乖其始合其終摧其牙落其角無使出吾之右徐以慶弔之言憂喜其心使神不得為心之主長生安樂富貴尊榮聲色喜悅慶言也死亡憂患貧賤苦辱刑戮誅伐弔言也與貴

者談言弔則悲與賤者談言慶則悅將其心迎其意或慶或弔以惑其志情變於內者形變於外常以所見而觀其所隱所謂測隱探心之數也雖有先王之道聖智之術而無此者不足成霸王之業也

政有誅強篇第十

經曰夫國有亂軍者士卒怯弱器械柔銳政令不一賞罰不明不預焉所謂亂軍者豪家權臣閭寺嬖昵為之軍吏權軍之勢擅將之威公政私行私門公謁上發謀

下沮議上升令下不行猛如虎貪如狼狼如羊強不可  
制者是亂軍皆宜誅之文宣誅少正卯於兩觀而魯國  
清田穰苴斬莊賈於表下而軍容肅魏絳戮揚干而諸  
侯服夫誅豪者益其威戮強者增其權威權生於豪強  
之身而不在於士卒之庸豪強有兼才者則駕而御之  
教而導之如畜鷙鳥如養猛虎必節其飢渴翦其牙爪  
絆其足結其舌呼之而隨嗾之而走牢籠其心使馴吾  
之左右豪強無兼才者則長其惡積其凶縱其心橫其

氣使禍盈於三軍結怨於萬人然後誅以壯吾氣故曰  
不善人者善人之資為將帥者國之師不誅豪強何以  
成軍之威哉

太白陰經卷一



欽定四庫全書

太白陰經卷二

唐 李筌 撰

人謀下

善師篇第十一

經曰兵非道德仁義者雖伯有天下君子不處周德既衰諸侯自作禮樂專征伐始於魯隱公齊以技擊強魏以武卒奮秦以銳士勝說者以孫吳為宗惟荀卿明於

王道而非之謂齊之技擊是亡國之兵魏之武卒是危國之兵秦之銳士是干賞蹈利之兵至於齊桓晉文之師可謂入其域而有節制矣故齊之技擊不可以遇魏之武卒魏之武卒不可以值秦之銳士秦之銳士不可以當桓文之節制桓文之節制不可以敵湯武之仁義故曰善師者不陣善陣者不戰善戰者不敗善敗者不亡黃帝獨立於中央而勝四帝所謂善師者不陣也湯武征伐陳師誓衆放桀擒紂所謂善陣者不戰也齊桓南服強楚使貢周室北

伐山戎為燕開路所謂善戰者不敗也楚昭王遭闔閭之禍國滅出亡父兄相與奔請救秦人出兵楚王反國所謂善敗者不亡也凡兵所以存亡繼絕救亂除害故伊呂之將子孫有國與殷周並至末代苟任詐力貪殘孫吳韓白之徒皆身被刑戮子孫不傳於嗣蓋兵者凶器戰者危事陰謀逆德用凶器非道德忠信不能以兵定天下之灾除兆民之害

貴和篇第十二

經曰先王之道以和為貴貴和重人不尚戰也春秋左傳曰君若以德綏諸侯誰敢不服君若以力楚國方城以為城漢水以為池雖君之衆無所用也是故晉悼公使魏絳和戎以正諸夷八年之間九合諸侯如樂之和無所不諧羗戎亦歸晉魏公內不侵不叛之臣於是有一瞰之師譬如捕鹿晉人犄之戎人角之有道之主能以德服人有仁之主能以義和人有智之主能以謀勝人有權之主能以勢制人戰勝易和勝難語曰先王耀德

不觀兵戢而時動動則威觀則玩玩則無震故有衣冠  
之會未嘗有歃血之盟有兵車之會未嘗有戰陣之事  
兵者不祥之器不得已而用之古先帝王所以舉而勝  
人成功出於衆者先文德以懷之不服飭玉帛以啗之  
啗之不來然後命士將練車馬銳甲兵攻其無備出其  
不意所謂叛而必討服而必柔既懷既柔可以示德書  
曰戒之用休董之用威夫如是則四夷不足吞八蠻不  
足庭也

廟勝篇第十三

經曰天貴持盈不失陰陽四時之紀綱地貴定傾不失  
生長均平之土宜人貴節事調和陰陽布告時令事來  
應之物來知之天下盡其忠信從其政令故曰天道無  
災不可先來地道無殃不可先昌人事無失不可先伐  
四時相乘水旱愆和冬雷夏霜飛蟲食苗天災也山崩  
川涸土不稼穡水不潤下五穀不樹八穀不成地殃也  
重賦苛政高臺深池興役過差縱酒荒色遠忠聽佞窮

兵黷武人失也必視天灾而覩地殃傍觀人失不則天不可動師不法地不可行征伐不和於人不可成天贊其時地資其財人定其謀靜見其陽動察其陰先觀其迹後知其心所謂勝兵者先勝而後求戰敗兵者先戰而後求勝故曰未戰而廟算勝者得算多也未戰而廟算不勝者得算少也多算者勝少算者不勝而況於無算乎以此觀之勝負易見矣

沈謀篇第十四

經曰善用兵者非信義不立非陰陽不勝非奇正不列  
非詭譎不戰謀藏於心事見於迹心與迹同者敗心與  
迹異者勝兵者詭道也能而示之不能用而示之不用  
心謀大迹示小心謀取迹示與感其直疑其詐而詐不  
決則強弱不分湛然若玄陰之無象淵然如滄海之不  
測如此則陰陽不能算鬼神不能知術數不能窮卜筮  
不能占其況於將乎夫善戰者勝敗生於兩陣之間其  
謀也策不足聽其勝也形不足觀能言而不能行國之



實能行而不能言國之用故曰至士不說至兵不言微乎  
神乎故能通天地之理備萬物之情是故貪者利之使其  
難厭強者卑之使其驕矜自用則忠臣廢攜貳則謀臣去  
周文離商而商受殺勾踐卑吳而夫差戮漢高離楚而項  
羽亡是故屈諸侯者以言役諸侯者以策夫善用兵者攻  
其愛敵必從擣其虛敵必隨多其方敵必分疑其事敵必  
備從隨不得守城分備不得併兵則我逸而敵勞敵寡而我  
衆夫以逸擊勞者武之順以勞擊逸者武之逆以衆擊寡

者武之勝以寡擊衆者武之敗能以逸擊勞以衆擊寡吾所以得全勝矣夫竭三軍氣奪一將心度萬人力斷千里糧者不在武夫行陣之勢而在智士權算之中柔兮弱兮卷之不盈懷袖沈兮密兮舒之可經寰海五寸之鍵能制闔開方寸之心能易成敗知周萬物而不殆曲成萬物而不遺順天信人察始知終則謀何患乎不從哉

子卒篇第十五

經曰古者用人之力歲不過三日藉歛不過什一公劉

好貨居者有積倉行者有裹糧大王好色內無怨女外  
無曠夫文王作刑國無冤獄武王行師士樂其死古之  
善率人者未有不得其心而得其力者也未有不得其  
力而得其死者也故國必有禮信親愛之義然後人以  
飢易飽國必有孝慈廉恥之裕然後人以死易生人所  
以守戰至死而不衰者上之所施於人者厚也上施厚  
則人報之亦厚且士卒之於將非有骨肉之親冒鋒鏑  
突干刃死不旋踵者以恩信養之禮恕導之小惠漸之

如慈父母育愛子也故能救其險厄拯其塗炭卑身下  
士濟免甘苦親臨疾病寒不衣裘暑不操扇登不乘馬  
雨不張蓋軍幕未便將不言坐軍井未達將不言渴妻  
子縫補於行間身分功於作役簞醪之饋必投於河挾  
纊之言必巡於軍是以人喜金鐸之聲厚卒如嬰兒可  
與之赴深溪視卒如愛子可與之俱死厚而不能使愛  
而不能令亂而不能理譬如驕子不可用也是故令之  
以文齊之以武是謂必取語曰夫妻諧可以攻齊小僕

怒可以攻魯王翦李牧吳起田穰苴竟以此術而兵強於諸侯

選士篇第十六

經曰統六軍之衆將百萬之師而無選鋒渾而雜用即智者無所施其計辯者無所施其說勇者無所施其奮力者無所著其壯無異獨行中原亦何取於勝負哉故孫子曰兵無選鋒曰北夫選士有以賞賞得其進用士有以刑刑懼則退古之善選士者懸賞於中軍之門有

深沈謀慮出人表者以上賞而禮之名曰智囊之士有辭縱禮橫飛箝捭闔能移人之性奪人之心者以上賞而禮之名曰辯說之士有得敵國君臣門閭請謁之懽心者以上賞而禮之名曰鄉導之士有制造五兵攻守利器奇變譎詭者上賞得而厚之名曰伎巧之士有引五石之弓矢貫重鎧戈矛劍戟便於利用陸搏犀兕水攫黿鼉佻身捕虜擐旗撫鼓者上賞得而撫之名曰猛毅之士有立乘奔馬左右超忽踰越城堡出入廬舍而

亡形迹者上賞得而聚之名曰趨捷之士有往反三百里不及夕者上賞得而聚之名曰疾足之士有力負六百三十斤行五十步者上賞四百二十斤次賞得而聚之名曰巨力之士有知五行運三式多言天道謫說陰陽者下賞得而存之名曰伎術之士夫十士之皆盡其材任其道計謀使智囊之士談說使辯說之士離親間疏使間諜之士深入諸侯之境使鄉導之士建造五兵使伎巧之士摧鋒捕虜守危攻強使猛毅之士掩襲侵掠

使趨捷之士探報計期使疾足之士破堅陷剛使巨力之士託愚感癡使伎術之士此謂任才之道選士之術也三王之后五伯之辟得其道而興失其道而亡興亡之道不在人主聰明而在其選能之當其才也

勵士篇第十七

經曰激人之心勵士之氣發號施令使人樂聞興師動衆使人樂戰交兵接刃使人樂死其在以戰勸以賞勸戰賞以勵士水石無心猶可危而動安而靜況於勵士



乎古先帝王伯有天下戰勝於外班師校功集衆於中  
軍之門上功賜以金章紫綬錫以錦綵衣以繒帛坐以  
重裯享以太牢飲以醇酒父母妻子皆賜紋綾坐以重  
席享以少牢飲以酎酒大將軍捧賜偏將軍捧觴大將  
軍令於衆將曰戰士某乙等奮不顧身勇敢萬夫斬元  
戎之首塞大將之旗功高於衆故賜上賞子孫後嗣長  
稱卿大夫之家父母妻子皆受重賞牢席有差衆士咸  
知次功賞其銀章朱綬文綾之衣坐以重席享以少牢

飲以酎酒父母妻子賜以繒帛坐以單席享以雞豚飲以醢酒偏將軍捧賜下將軍捧觴大將軍令於衆曰戰士某乙等勇冠三軍功經百戰斬驍勇之首奪虎豹之旗功出於人故賜以中賞子孫後嗣長為勲給之家父母妻子皆受榮貴牢席有差衆士咸知下功賞以布帛之衣坐以單席享以雞豚飲以醢酒父母妻子立而無賞坐而無席下將軍捧賜卒捧觴大將軍令於衆曰戰士某乙等戮力行間劬勞歲月雖無搢旗斬將實以跋涉

疆場錫以下賞子孫後嗣無所庇諸父母妻子不及坐  
享衆士咸知令畢命上功起再拜大將軍讓曰某乙等  
忝列王臣敢不盡節有愧無功叨受上賞大將軍避席  
曰某乙等不德謬居師長賴爾之功梟懸兇逆盛績美  
事是用上賞退而復坐命次功再拜上功上功曰某乙  
等無謀無勇遵師長之命決勝負於一時無退生之辱  
身受殊賞上光父母下及妻子其勉旃退而復坐命下  
功再拜次功次功坐受曰某乙等少猛寡毅遵師長之

命決勝負於一時身受次賞上光父母下及妻子其勉  
旃下功退而復坐夫如是以勵之一會則鄉勉黨里勉  
隣父勉子妻勉夫二會縣勉州朋勉友三會則行路相  
勉聞金革之聲相踐而出隣無敵國亦無堅城士何患  
乎不勵哉

刑賞篇第十八

經曰有虞氏畫衣章服以刑輔繆而姦不犯其人醇湯  
武鑿五刑傷四肢以繆輔刑而姦不止其人淫有虞非

仁也湯武非暴也其道異者時也古善治天下者不賞仁賞  
仁則爭為施而國亂不賞智賞智則爭為謀而政亂不賞忠  
賞忠則爭為直而君亂不賞能賞能則爭為巧而事亂不  
賞勇賞勇則爭為先而陣亂夫蒞衆以仁權謀以智事君以  
忠制物以能臨敵以勇此五者士之常賞其常則致爭致  
爭則致亂則非刑不治故賞者忠信之薄亂之所由生刑  
者忠信之戒禁之所由成刑多而賞少則無刑賞多而刑少  
則無賞刑過則無善賞過則多奸王者以賞禁以刑勸求過

而不求善而人自為善賞文也刑武也文武者軍之法國之柄明主首出庶物順時以撫四方執法而操柄據罪而制刑按功而設賞賞一功而千萬人悅刑一罪而千萬人懼賞無私功刑無私罪是謂軍國之法生殺之柄故曰能生而能殺國必強能生而不能殺國必亡又曰能生死而赦殺者上也刑賞之術無私於人賞公於世以為道其道也非自立於堯舜之時非自逃於桀紂之朝用得之而天下治用失之而天下亂治亂之道在於刑賞不在於人君過

此以往雖彌綸宇宙經絡萬品生殺之用胥是道也

地勢篇第十九

經曰善戰者以地強以勢勝如轉圓石於千仞之深溪者地勢然也千仞者地之險圓石者轉之勢地無千仞而有圓石置之窾塘之中則不復轉地有千仞而無圓石投之方稜偏匾則不能復移地不因險不能轉圓石石不因圓不能赴深溪故曰兵因地而強地因兵而固善用兵者高陵勿向背丘勿迎負陰抱陽養生處實則

兵無百病是故諸侯自戰於其地名曰爭地彼我可往  
名曰交地三屬諸侯之國名曰衢地深入背人城邑名  
曰重地山林沮澤險阻名曰圯地出入迂隘彼寡可以  
擊吾衆名曰負地疾戰則存不戰則亡名曰死地故散  
地無戰輕地無陣爭地無攻交地無絕衢地合交重地  
則掠圯地則行負地則謀死地則戰是故城有所不攻  
計不合也地有所不受未見利也君命有所不聽不便  
事也凡地之勢三軍之權良將行之智將遵之而旅將



之欲幸全勝飛龜舞蛇未之有也

兵形篇第二十

經曰夫兵之興也有形有神旗幟金革依於形智謀計  
事依於神戰勝攻取形之事而用在神虛實變化神之  
功而用在形形粗而神細形無物而不鑒神無物而不  
察形誑而惑事其外神密而圓事其內觀其形不見其  
神不見其事叅之拽柴揚塵形之衆也滅竈滅火形之  
寡也勇而無剛當敵而速去形其退也斥山澤之險無

所不至形其進也油幕冠樹形其強也偃旗卧鼓寂若  
無人形其弱也故曰兵形象陶人之埏土鳧氏之冶金  
為方為圓或鐘或鼎金玉無常性因工以之名戰陣無  
常勢因敵以為形故兵之極至於無形則間諜不能窺  
智畧不能謀因形而措勝於衆衆不能知人皆知我所  
以勝之形莫知吾所以制勝之形形不因神不能為變  
化神不因敵不能為智謀故水因地而制形兵因敵而  
制勝也

作戰篇第二十一

經曰昔之善戰者如轉木石木石之性圓則行方則止行者非能行而勢不得不行止者非能止而勢不得不止夫戰人者自鬪於其地則散投之於死地則戰散者非能散勢不得不散戰者非能戰勢不得不戰行止不在於木石而制在於人散戰不在於人而制在於制勢而戰人也夫未見利而戰雖衆必敗見利而戰雖寡必勝利者彼之所短我之所長也見利則起無利則止見

利乘時帝王之資故曰時之至間不容息先之則太過後之則不及見利不失遭時不疑失利後時反受其害疾雷不及掩耳卒電不及瞑目赴之若驚用之若狂此因利之戰人也夫戰者左川澤右丘陵背高向下處生擊死此平地之戰人也逼敵無近於水彼知不免致死拒我困獸猶鬪蜂蠆有毒況於人乎令其半濟而擊之前者知免後者莫之蔑有關心敵逆水而來迎之於水內此水上之戰人也左右山陵溪谷險狹與敵相遇我

則金鼓蔽山旗幟依林登高遠斥出没人馬此山谷之戰人也勢利者兵之便山林平陸者戰之地夫善用兵者以便勝以地強以謀取此勢之戰人也如建瓴水於高宇之上砉然而無滯雷又如破竹數節之後迎刃自解無復著乎

攻守篇第二十二

經曰地所以養人城所以守地內得愛焉所以攻守不足攻有餘力不足者守力有餘者攻攻人之法先絕

其愛使無外救料城中之粟計人日之費糧多人少攻而勿圍糧少人多圍而勿攻力未屈粟未盡城尚固而支者攻之至也力屈粟殫城壞而不支者守之至也夫守城之法以城中壯男為一軍壯女為一軍男女老弱為一軍三軍無使相遇壯男遇壯女則費力而奸生壯女遇老弱則老使壯悲弱使強憐悲憐在心則使勇人更慮壯夫不戰故曰善攻者敵不知所守善守者敵不知所攻微乎微乎至於無形神乎神乎至於無聲故能

為敵之司命

行人篇第二十三

經曰國君擇日登壇拜大將軍繕甲兵具卒乘出則破  
人之國敗人之軍殺人之將虜人之俘贏糧萬里行於  
敵人之境而不知敵人之情將之過也敵情不可求之  
於星辰不可求之於鬼神不可求之於筮卜而可求之  
於人昔商之興也伊尹為夏之庖厨周之興也呂望為  
商之漁父秦之帝也李斯為山東之獵夫漢之王也韓

信為楚之亡卒魏之伯也荀彧為袁紹棄臣晉之禪也  
賈充仕魏魏之起也崔浩家晉故七君用而帝天下夫  
賢出奔必有佞臣持君之衡是以度佐有扈狐功專驩  
兜成均權三苗推移佞桀崇侯詔紂優旃惑晉故曰三  
仁去而商墟二老歸而周熾子胥死而吳亡范蠡存而  
越伯五穀入而秦喜樂毅出而燕懼將能收敵國之人  
而任之以當其材戰何患乎不克故曰羅其英敵國傾  
羅其雄敵國亡他山之石可以攻玉夫行人之用事有



二一曰因敵國之人來觀釁於我我高其爵重其祿察其辭覆其事實則任之虛則誅之任之以鄉導二曰吾使人觀敵國之君臣左右執事孰愚中外近人孰貪孰廉舍人謁者孰君子孰小人吾得其情因而隨之可就吾事夫三軍之重者莫重於行人三軍之密者莫密於行人行人之謀未發有漏與告者皆死謀發之日削其橐焚其草金有口木有舌無使內謀之泄若鷹隼之入重林無其蹤如遊魚之赴潭無其跡離婁俛首師曠傾

耳不聆其聲微乎微乎與纖塵俱飛豈飽食醉酒恃力輕合之將而得見行人之事哉

鑒才篇第二十四

經曰人稟元氣所生陰陽所成淳和平淡元氣也聰明俊傑陰陽也淳和不知權變聰明不知至道夫人柔順安恕失於決斷可與循節難於權宜強悍剛猛失於猜忌可與涉難難於持守貞良慎畏失於狐疑可與樂成難於謀始清介廉潔失於局執可與立節難於通變韜晦沉靜失於遲迴可與深慮難於應

捷夫聰明秀出謂之英膽力過人謂之雄英者智也雄者力也英不果敢雄不能智謀故英得雄而行雄得英而成夫人有八性不同仁義忠信智勇貪愚仁者好施義者好親忠者好直信者好守智者好謀勇者好決貪者好取愚者好矜人君合於仁義則天下親合於忠信則四海賓合於智勇則諸侯臣合於貪愚則受制於人仁義可以謀縱智勇可以謀橫縱成者王橫成者伯伯王之道不在於兵強士勇之際而在於仁義智勇之間此亦

偏才未足以言大將軍若夫能柔能剛能翕能張英而有勇雄而有謀圓而能轉環而無端智周萬物而道濟於天下此曰通才可以為大將軍矣故曰將者國之輔輔周則國強輔隙則國弱是謂人之司命國家安危之主不可不察也明主所以擇人者閱其才通其用鑒其貌厚其責察其心貞其明居高而遠望徐視而審聽神其形聚其精若山之高不可極若泉之深不可測然後審其賢愚以其辭擇其智勇以任事及其可任之夫擇

聖以道擇賢以德擇智以謀擇勇以明擇貪以利擇奸  
以隙擇愚以危事或同而觀其道或異而觀其德或權  
變而觀其謀或攻取而觀其勇或臨財而觀其利或  
捭闔而觀其間隙或恐懼而觀其安危故曰欲求其本  
察其性欲求其古察其今先察而任者昌先任而察者  
亡昔市偷自育於晉晉察而用之勝楚伊尹自育於湯  
湯察而用之放桀智能之士不在遠近仁人不因困厄  
無以廣其德智士不因棄時無以舉其功王者不因絕

亡無以立其義霸者不因強敵無以遺其惠明主任人不失其能直士舉賢不離於口無萬人之智者不能據於萬人之上故曰不知軍中之事而同軍中之政者則軍惑矣不知三軍之權而同三軍之任者則軍士疑矣既疑且惑則諸侯之難至矣夫如是則君不虛王臣不虛貴所謂君道知臣臣術知事者也

太白陰經卷二

欽定四庫全書

太白陰經卷三

唐 李筌 撰

授鉞篇第二十五

經曰有國疆場之役天子居正殿命將軍詔之曰朕以  
不德謬承大運致寇敵侵擾攻掠邊陲宵旰忘食憂在  
寤寐勞將軍之神武帥師以應之將再拜受詔乃令太  
史卜齋三日於太廟拂龜太史擇日以授鉞君入廟西

面而立親操鉞以刃授將軍曰從此以往上至於天將軍制之復操斧柄授將軍曰從此以往下至於泉將軍制之將軍既受命跪而答曰臣聞國不可從外治軍不可從外御二心不可以事君疑志不可以應敵臣既受命專斧鉞之威臣不願生還請君亦無垂一言之命於臣臣不敢將君許臣乃辭而行軍中之事不聞君命皆由於將將出臨敵決戰無有二心若此無天於上無地於下無君命傍無敵人是故智者為之慮勇者為之鬪



氣勵清爽疾若馳驚兵不授刃而敵降服戰於外功立於內於是將軍乃縞素避舍請罪於君君命捨之

部署篇第二十六

經曰兵有四正四奇總有八陣或合而為一或離而為八以正合以奇勝餘奇為握奇聚散之勢節制之變也一萬二千五百人為一軍一萬二千象十有二月五象閏餘窮陰算陽備物成功征無義伐無道聖人得以興亂人得以廢廢興存亡昏明之術皆由兵也司馬穰苴

曰五人為伍二伍為部部隊也一軍凡二百五十隊每十隊以為三奇風后曰餘奇握奇故一軍以三千七百五十人為奇兵隊七十有五外餘八千七百五十人部隊一百七十五分為八陣陣有一千九十三人七分五銖隊有二十二入七人為一隊陣之部署令舉一軍則千軍可知矣

將軍篇第二十七

經曰三軍之衆百萬之師張設輕重在於一人不可不

察也一人大將軍智信仁勇嚴謹賢明者任二人副大將軍智信仁勇嚴毅平直者任一人主軍糧一人主軍馬四人總管勇嚴識軍容者任二人主左右虞候二人左右押衙八人子將明行陣辦軍草驍部署任八人大將別奏十六人大將兼侍從官吏八人副大將別奏一十六人總管兼八人子將別奏一十六人子將兼忠勇驍果孝義有藝能者任一人判官沉深計密事精敏者任儒鈍勿用一人主軍糧一人主征馬正主軍令斬斷

罪隸及行軍禮儀進止賓客祭祀四人軍典謹厚明書  
算者任

陣將篇第二十八

經曰六者君立於陽大夫立於陰是以臣不得窺君下  
不得窺上則君臣上下之道隔矣夫智均則不能相使  
力均則不能相勝權均則不能相懸道同則不能相君  
勢同則不能相主情同則不能相順情異則不能相同  
故大將以智裨將以勇以智使勇可得而從哉一人偏

將軍勇猛果敢輕命好戰者任二人副將軍無謀於敵  
有死於力守成窺而不失者任四人子將目明旌旗耳  
察金鼓心存號令宣布德威者任二人虞擒奸伏探覘  
非常伺察動靜飛符走檄安忍好殺事通惟時者任二  
人承局點差均平更漏無失糾舉必中者任六人偏將  
軍別奏一十二人偏將兼六人副偏將別奏一十二人  
副偏將軍兼八人虞候兼充子虞候並惡驍勇果孝義  
藝能者任一人判官主倉糧財帛出納軍器刑書公平

任二人軍典明書計謹厚者任

隊軍篇第二十九

經曰智者之使愚者也聾其耳瞽其目迷其心任其力  
然後用其命如驅羣羊驅而往驅而來莫知所之登高  
去其梯入諸候之境廢其梁役之以事勿告之以謀語  
之以利勿告之以害則可德其心而主其身如此則生  
死聚散聽之於我是謂良將一人隊將經軍陣習戰鬪  
識進止者任一人押官一人隊頭二人副頭隊主文書

酌功賞知勞苦明部分行列疎密並責成於副隊副公  
直明曉者任一人東旗二人副旗並壯勇者任一人抱  
鼓主昏明嚴警進退節制氣勇志銳者任一人吹角主  
收軍退陣謹守節制懦怯忠謹者任一人司兵主五兵  
利銳支分器仗明辨者任一人司倉主支分財帛給付  
軍糧清廉者任一人承局主雜供差料人情惡口舌者  
任五人火長主廚饌飲食養病守火內衣資樵採戰陣  
不預仁義者用任

征馬篇第三十

經曰夫戎馬必安其所處適其水草節其飢飽冬則溫廐  
夏則涼廡刷剔毛鬣謹落四蹄押其耳目使不驚駭習  
其驅馳閑其進止人馬相親然後可使鞍勒轡銜必先  
完堅固斷絕必補凡馬不傷於末必傷於始不傷於飢  
必傷於飽日暮道遠必數上下寧勞於人慎無勞馬常  
令有餘備敵覆我能明此者可以橫行八方凡馬軍一  
人支兩匹一軍征馬二萬五千匹其無馬亦加五支令



以兩匹為率一征馬副大將軍軍中擇善牧養者任二  
人征馬總管副偏將軍軍中擇善牧養者任八人征馬  
子將軍陣中擇明閑養牧者任五十人征馬押官軍  
中擇取善牧養者任五百人羣頭善乘騎者任一人羣  
頭醫亦羣頭中取外差一千人馬子軍外差又云五百  
人馬子醫馬在內

鑒人篇第三十一

經曰凡人觀其外足知其內七竅者五臟之門戶九候

三停定一尺之面智愚勇怯形一寸之眼天倉金櫃以別其貴賤貧富夫欲任將先觀其貌乃知其心神考其形法容貌堂堂精爽清徹聲色不變其志榮枯不易其操是謂神有餘形心有餘法頭頂豐停腹肚濃厚鼻圓而直口方而稜頤額相臨顧耳高聳肉多而不餘骨粗而不露眉目明朗手足鮮紅望下而就高比大而就小是謂形有餘神心有餘法遏惡揚善後已先人無疾人以自貪無危人以自安好施陰德常守忠信豁達大度

不拘小節是謂心有餘神 鑒頭目鼻口古齒法虎  
頭高視富貴無比犀頭峯崱富貴鬱鬱象頭高廣祿福  
居長鹿頭側長志氣雄強龜頭郁縮喉豐酒肉獺頭橫  
潤志氣豁達駱頭蒙鴻福祿千鍾蛇頭平薄財帛聊落  
貉頭尖銳貧厄無計兔頭蔑頤志氣下劣狗頭尖圓泣  
涕連連眉直頭昂富貴吉昌眉薄而希少信多欺髮欲  
細密鬚欲粗疎眼光明靜者貴眼鼻成就者魂魄  
強眉目慈善者好施與眼鼻口小者多虛無實眼鼻口

大者有實無虛眼中赤脉貫瞳子奇兵死難目捲頭不  
淫即偷羊目直視無情好殺猪目應瞪刑禍相仍亦小貴  
蜂目豺聲常行安忍枯髅目心難測魚目多厄鼠目窮  
寒鷹視狼顧常懷嫉妬牛頭虎視富貴無比目隆圓實  
富貴終吉鼻孔小縮慳貪不足蜣螂鼻少意智野狐鬚  
無期信殺羊鬚多狐疑口如鳥啄雄心難制口如馬嘴窮  
來客死口如河海富貴自在唇如點朱才學代無舌紅  
目厚神識自守吐舌及鼻有壽且貴鋸齒食肉平齒食

菜疎齒猛毅密齒醇和細齒長白名曰猊齒 鑒頷耳  
項胸背面壯黑子面形法燕頷封侯頤尖足肉意智不  
足耳輪厚大者貴而且壽小薄者夭而且賤虎項圓粗  
富貴有餘鷄頸烏頭財物乏少起居露處兇惡非凡面  
欲圓胸欲方尻欲厚背欲圓上欲長下欲短五嶽成四  
瀆好頭高足短臂長似虎所謂行住坐卧飲食音似非  
一處也 鑒頭骨玉枕額文法腦頭聳起者將軍  
三關玉枕萬戶侯近下者將軍⊕車輻枕封侯三星枕

封王○偃月枕封侯十木方枕二千石○酒樽枕二千石三公止字枕封侯○圓枕封侯北額上有北字文將軍八額上兩立文二千石眉間有四文封侯八眉間有八字龍文將軍三額上有三偃月文封侯（額上有覆月文將軍八眉上有文通髮將軍土眉間有土字文封侯文眉間有文字文者死凡人色欲正不欲邪白如凝脂黑如傅漆紫如爛椹黃如蒸栗赤如炎火青如浴藍皆三公將相也

相馬篇第三十二

經曰相馬之法先相頭目耳耳如批竹眼如鳥目顰脊  
麟腹虎胸尾如垂簾次相頭稜角成就前看側看但見  
骨側狹見皮薄露鼻衡柱高低額欲伏臺骨分明分段  
清楚視瞻欲遠精神體氣高爽立蹄攢聚行止循良走  
驟輕操毛鬣輕順喘息均細擎頭如鷹龍頭高舉而遠  
望深視而遠聽前看如雞鳴後看蹲局立如獅子避兵  
萬里領鼻中欲得受人拳名曰太倉太倉寬易飼胸臆

欲潤胸前三臺骨起分段分明鬣欲高頭欲方目欲大  
而光脊欲強壯有力腹脇欲張四下欲長耳欲緊小小  
即耐勞目大膽大膽大則不驚鼻欲大鼻大則肺大肺  
大則能走賺欲小小則易飼肋欲得密口欲上尖下方  
舌欲薄長赤色如朱齒欲齧辦分明牙去齒二寸欲下  
廣且平方牙欲白則壽長望之大就之小勛馬也前視  
見目傍觀見腹後視見肉駿馬也齒欲齊密上下相當  
上脣欲急而方下唇欲緩而厚口欲紅而有光如穴中



省火千里有壽臆間欲廣一尺以上能久走頭欲高如  
剥兔龍顙突目平脊大腹脰肉多者行千里眼紫縷貫  
瞳子者五百里上下徹者千里凡馬不問大小肥瘦數  
肋有十二三四百里十四五五百里旋毛起腕膝  
上者六百里腹脊上五百里項轅大者三百里目中有瞳  
人如並立並坐者千里羊鬚中生距如雞者五百里耳  
本下角長一二寸者頭如渴鳥者千里馬初生無毛七  
日方能行者千里尿過前蹄一寸以上者五百里屎舉

一足如犬者千里腹下逆毛千里蘭孔中有筋皮及毛者五百里眼上孔是也蹄青黑赤白紅硬如鋒有隴道成者軟口又吻頭厚者硬口又淺小者不能食眼下無狀蟲及骨肉者咬人目小多白驚後蹄欲曲腕耳中欲促凡馬後兩足白者老馬駒前兩足白者少馬駒馬有五勞卸鞍不驤者骨勞驤而不起者筋勞起而不振者皮勞振而不噴者氣勞吐而不尿者血勞絆之却行三十步瘡皮勞以手摩兩鞍下汗出瘡氣長韁牽之行得

尿瘡血勞高繫勿令低頭而食瘡馬口春青色夏赤色  
秋白色冬黑色皆死此名入口病也

誓衆軍令篇第三十三

經曰陶唐氏以人戒於國中欲人強其命也有虞氏以  
農教戰漁獵簡習故人體之夏后氏誓衆於軍中欲人  
先其慮也殷人誓於軍門之外欲人先意以待事也周  
人將交白刃而誓之以致人意也夏賞於朝賞善也殷  
戮於市戮不善也周賞於朝戮市兼質文也夫人心定

言以言出令故須振雄畧出勁詞銳鐵石之心凜風霜之氣發揮號令申明軍法

誓衆文 某將軍某乙告爾六軍將吏士伍等聖人弦木為弓剡木為矢弧矢之利以威不庭兼弱攻昧取亂侮亡今邊方不庭式干王命皇帝授職斧鉞肅將天威有進死之榮無退生之辱用命賞於祖不用命戮於社將無二令軍無二言勉爾乃成慎從王事無二典刑軍令經曰師衆以順為武有死無犯為恭故穰苴斬莊賈

魏絳戮楊干而名聞諸侯威震隣國令之不行不可以  
稱兵三令而不起於發者吏士之罪也申明而不如法  
者將之過也先申三日懸令於軍門付之軍正使執本  
宣於六軍之衆有犯令者准令按理而後行刑使六軍  
之禁勿敢違也一漏軍事者斬漏泄軍中陰謀及告事  
者皆死一背軍走者斬在道及營臨陣同一不戰而降  
敵者斬背順歸逆者同一不當日時從期者斬計事會戰  
同阻雨雪水火不坐一與敵人私交通者斬籍沒其家

言語書疏同一失主將者斬隨坐即不坐一失旌旗節  
鉞者連隊斬與敵人所取同一臨難不相救者斬為敵  
所急不相救者同誑惑訛言妄說陰陽卜筮者斬妄說鬼  
神災祥以動者同一無故驚軍者斬呼呌奔走妄言烟  
塵有賊者同一遺棄五兵軍裝者斬不謹固檢察者同  
一自相竊盜者斬不計多少一將吏守職不平藏情相  
容者斬理事曲法者同一以強凌弱擄捕忿爭酗酒喧  
競惡罵無禮於理不順者斬因公宴集醉者不坐一軍

中奔出車馬者斬將軍以下並步入營乘騎者同一破敵先虜掠者斬入敵境者亦同一更鋪失候犯夜失號擅宿他火者斬恐奸得計一守圍不固者斬一火及主吏者斬一不復差遣及主吏使不平者斬有私及強梁者斬一侵百姓姦居人子女及將婦人入營者斬恐傷人軍中慎女子氣一違將軍一時一令皆斬

關塞四夷篇第三十四

經曰關塞者地之要害也設險守固所以阻隔蠻夷內

諸夏而外夷狄尊衣冠禮樂之國卑氈裘毳服之長是以要荒侯甸從茲別矣 關內道自京西北出關鎮經朔方節度去西京一千八百五十里去東京二千里關五原塞表匈奴之故地以渾部落為臯蘭都督府斛律部落為高關州渾甸焦部為浚稽州魯嚴塞下胡州党項十四州拓跋舍剌僕國野剌桑乾節子等部落救其原野 黃河北道安北去舊西京五千二百里東京六千六百里今移在永清去西京二千七百里去東京三



千四百里關大漠以北迴紇部落為瀚海都督府多覽  
部落為燕然督都府思結部為廬山都督府同羅受  
按一口部落為幽陵都督府同羅部落為龜林都督府  
甸利羽為雞田州奚結部落為雞鹿州道歷陰山牟那  
山龍門山牛頭山鐵勒山北庭山大刺山諾真山涉黑  
沙道入十姓部牧居地 河東道自京西東出蒲律關  
經太原抵河東節度去西京二千七十五里去東京一  
千六百四十五里開榆林塞北以頡利左渠故地置雲

中都督府管阿史那等五州道歷三川口三山母谷道  
通常室大落泊東入溪西入默啜故地隴右道自京  
出震關經隴西節度去西京一千四百里去東京二千  
二百七十五里南出關黨項雜羌置峒叢麟可等四十  
州分利緣邊諸府西拒吐蕃去西京一萬二千里北去  
鳳林關渡黃河西南入鬱標柳谷彰濠青海大非海鳥  
海小非海星海泊悅海萬海白海魚海入吐蕃河西  
道自西京北出蕭關金城關自河西節度去西京二千

一十里去東京二千八百十一里北海抵日停海彌峨  
山獨洛河道入九姓十箭三窟故居道北庭道自北京  
西北出經河節度出玉門關涉河關菖蒲海東出高昌故  
地置西州以突厥處密部落為瑤池都督府以雜種故  
胡處部為庭州為北庭都護去西京一千七百五十六  
里去東京六千七百七十六里北抵播塞厥海長海關  
海曲地以突結骨部落置堅昆都督府管拘勒羅都督  
為燭籠州北抵瀚海去西京二萬里安西道自西京

出涉交河出鐵門關至安西節度去西京八千五十里  
踈入踈勒鄆耆碎葉于闐黑海雪海大宛月支康居大  
夏掩蔡黎軒支烏孫等國 劍南道自東京西南出大  
散關經甘亭關百牢關越劍關松嶺關至劍南節度去  
西京二千三百七十里去東京三千二百一十六里出  
蠶涯關過笱道雜羗六十四州分列山谷路入吐蕃南  
出邛笕開通越嶲渡慮河雲南關西徼行雜蠻置冉蒙  
弄覽六十州路入甘河夜郎滇池身毒五天竺國去西

京三萬五千里 范陽道自西京出潼關至范陽節度  
去西京二千五百二十里去東京一千六百八十六里  
北去居庸關盧龍門塞外東湖故地以契丹番長置饒  
樂都督府迴紇五部落分為五州以白霄部落為居延  
州黑霄部落為真顏州北至烏羅渾去東京一萬五千  
里 平盧道自西京經范陽節度東至榆林關至平盧  
節度去西京三千七百里東京三千里抵安東遼水路  
接奚契丹室韋勃海靺鞨高麗水黑嶺南道自西京南

出藍田關漢越江大庾嶺經南海節度去西京五千六  
百里去東京四千二百七十里路入銅柱林邑九真日  
高直臘銅勒交趾等國 河西道自西京出潼關經東  
萊節度去西京二千七百六十里去東京一千八百五  
十三里東涉滄海拒熊津都督府北濟國又東抵雞林  
都督府新羅國又東南涉經海抵利磨國屬維涉海達  
倭國一名日本其海行無復里數

太白陰經卷三